

आकाशवाणी

खबरां -----

1. बिहार च भारतीय चुनां आयोग नै 2 मतदाता पंछान पत्रें गी लेइयै विवाद च फंसे दे राश्ट्री जनता दल नेता तेजस्वी प्रसाद यादव थमां जांच लेई विस्तृत जानकारी मंगी ऐ।
2. बीजेपी नै आखेआ ऐ जे आर.जे.डी नेता तेजस्वी यादव नै 2 मतदाता पंछान पत्र रक्खियै अपराध कीता ऐ।
3. रेल मंत्री अश्विनी वैश्वणव होरें भावनगर अयोध्या थमां छावनी साप्ताहिक रेल गड्डी गी झंडी दस्सियै रवाना कीता ते कन्नै गै रेवा पुणे ते जबलपुर रायपुर रेलें दा बी वर्चुअल ढंगै नै उद्घाटन कीता।
4. फिलीपीन्स दे राश्ट्रपति Ferdinand R. Marcos Junior होर कल दपैहरी भारत दी 5 रोजा राजकीय जात्तरा पर नमी दिल्ली पुज्जडन।
5. औंदे स्वतंत्रता दिवस समारोह गितै दिल्ली पुलिस नै सुरक्षा कारणें करी 16 अगस्त तोड़ी राजधानी च ड्रोन ते ब्हाई उपकरणें पर लाया प्रतिबंध।
6. उत्तर प्रदेश च गोंडा जिले च इक शिड़क हादसे च 11 लोकें दी मौत ते 4 जखमी।

<><><><><><>

Bihar-Tejasvi

बिहार च भारती चुनां आयोग नै 2 मतदाता पंछान पत्रें गी लेइयै विवाद च फंसे दे राश्ट्रीय जनता दल (राजद) नेता तेजवी प्रसाद यादव थमां जांच लेई विस्तृत जानकारी मंगी ऐ। दीधा विधानसभा क्षेत्र दे इ.आर.ओ होरें आखेआ जे श्री यादव आसेआ कल इक प्रेस कांफ्रेंस च दस्सेआ गेआ जे मतदाता पंछान पत्र चुनां आयोग आसेआ जारी नेई कीता गेआ हा। राजद नेता दा नां दीधा विधानसभा क्षेत्र दी मतदाता सूची च दर्ज ऐ। श्री यादव होरें मतदाता पंछान पत्र संख्या दस्सदे होई आरोप लाया हा जे उंदा नां मसौदा मतदाता सूची थमां हटाई दित्ता गेआ ऐ।

<><><><><><>

BJP-Tejasvi

भारती जनता पार्टी नै आरोप लाया ऐ जे राश्ट्री जनता दल दे नेता तेजस्वी यादव हुंदा मतदाता पंछान पत्र रक्खियै अपराध कीता ऐ। पार्टी नै आखेआ जे तेजस्वी यादव होरें संवाददाता सम्मेलन च जिस चुनावी फोटो पंछान पत्र दा हवाला दित्ता, ओह उंदे आधिकारिक मतदाता पंछान पत्र थमां बक्ख ऐ। पार्टी प्रवक्ता संबित पात्रा होरें अज्ज नमीं दिल्ली च संवाददाताएं कन्नै गल्ल करदे होई सुआल पुट्टेआ जे क्या श्री यादव होरें चुनां आयोग दे सामने गलत तथ्य पेश कीते न। उनें आखेआ जे तेजस्वी यादव होरें 2020 दे अपने चुनावी हल्फनामे च जेड़ा मताता पंछान पत्र जमा कीता हा, ओह उस पंछान पत्र थमां बक्खरा ऐ जिसदे बारे च उनें कल दावा कीता हा जे विशेष गहन पुरीक्षण दे बाद मतदाता सूची थमां उंदा ना गायब ऐ।



Padma-Awards

पद्म पुरस्कारें लेई नामांकन ते सफारशें दी खीरी तरीक 15 अगस्त तोहडी बधाई दिती गेई ऐ। पुरस्कारें लेई नामांकन छडे राश्ट्री पुरस्कार पोर्टल पर ऑनलाइन हासल कीते जाडन। बरे 2026 लेई पद्म पुरस्कारें दा ऐलान गणतंत्र दिवस, 2026 दे मौके उप्पर कीता जाहग। एकडे पुरस्कारें च - पद्म विभूषण, पद्म भूषण ते पद्म श्री पुरस्कार शामिल ना। एह पुरस्कार विशिष्ट कम्मं गी मान्यता प्रदान करने लेई सभ्भनें खेत्तरे ते विशें च विशिष्ट ते असाधारण उपलब्धियें सने सेवा लेई दिता जं'दा ऐ।



Guj-Vaishnav

रेल मंत्री अश्विनी वैष्णव होरें अज्ज भावनगर रेलवे स्टेशन थमां भावनगर अयोध्या छावनी साप्तिहिक रेल गड्डी गी झंडी दस्सिये रवाना कीता। श्री वैष्णव होरें रीवा थमां पुणे ते जबलपुर थमां रायपुर लेई 2 होरनें रेल गड्डिये गी बी वर्चुअल रूपै नै झंडी दस्सी। उनें आखेआ जे पिछले 11 बरें च 34 ज्हार किलोमीटर नमी रेल पटडियां बिछाइयां गेइयां जेडी भारती रेलवे च होआ रदे व्यापक बदलाव दा प्रमाण ऐ। इस मौके पर श्री वैष्णव होरें गुजरात लेई बी कई घोषणां कीतियां। इस मौके पर रेल मंत्री हुंदे कन्नै ेकंद्रीय मंत्री मनसुख मांडविया ते निमू बेन बाम्भानिया होर बी उत्थे मजूद हे।



Philippines-President Visit

फिलीपीन्स दे राष्ट्रपति Ferdinand R. Marcos junior होर कल दपैहरी भारत दी 5 रोजा राजकीय जात्तरा पर नमीं दिल्ली पुज्जंगन। उंदे कन्नै प्रथम महिला लुईस अरनेटा मार्कोस ते इक उच्च सतह दा प्रतिनिधिमंडल बी औग जेदे च कई कैबिनेट मंत्री, होरनें गणमान्य व्यक्ति ते वरिष्ठ अधिकारिएं सने बपारिक प्रतिनिधि बी शामिल होंगन। फिलीपीन्स दे राष्ट्रपति दा पड्डार साम्भने दे बाद राष्ट्रपति मार्कोस हुंदी एहू पैहली भारत जात्तरा दरान प्रधानमंत्री मोदी ते राष्ट्रपति मार्कोस मंगलवार गी दपक्खी वार्ता करंगन।

<><><><><><>

Athletic-India

एथलेटिक्स च ओलंपियन तजिंद्रपाल सिंह तूर, सर्वेश कुमार ते विथया रामराज होरें कल लुधियाना च इंडियन ग्रैंड प्रिक्स-3 च अपने खितब जित्ते। तजिंद्रपाल सिंह होरें पुरूषें दी शाटपुट मकाबले च 18 अशारिया 9-3 मीटर दी श्रो सुट्टियै दबदबा बनाया जिसलै जे इकबाल सिंह चहल 17 अशारिया 4-6 मीटर ते साहिब सिंह 17 अशारिया 2-5 मीटर उन्दे थमां अगगे रेह। पुरूषें दी उच्ची कूद च सर्वेश कुशारे होरें 2 अशारिया 2-3 मीटर दी श्रो सुट्टियै जित्त हासल कीती ते 2 मीटर थमां मती दी छाल लाने आहले इकमात्र एथलीट रेय। महिलाएं दी 400 मीटर द्रौड च विथ्या रामराज नै 1 मिनट च 1 अशारिया 0-1 सेकंट दे समें कन्नै जित्त हासल कीती।

<><><><><><>

I Day Delhi Police

दिल्ली पुलिस अँदे स्वतंत्रता दिवस समारोह गी ध्यानै च रखदे होई 16 अगस्त तगर दिल्ली च रिवायती उपकरणें दी डोआरी पर पाबंदी लाई दित्ती ऐ। दिल्ली पुलिस गी थोई दी इत्तलाह मूजब किश आपराधिक ते गैर समाजी तत्व ते आतंकी पैराग्लाइडर, पैरामोटर, हेंग ग्लाइडर, यूएवी, माइक्रोलाइट जहाज ते इस चाल्ली दे होरनें उपकरणें दी मदद कन्नै सुरक्षा लेई खतरा पैदा करी सकदे न जेदे करी दिल्ली पुलिस दे कमिशनर एस.बी.के सिंह होरें एह हुक्म जारी कीता।

<><><><><><>

UP-Accident

उत्तर प्रदेश दे गोंडा जिले च अज्ज बडुलै इक शिड़क हादसे च 11 लोकें दी मोत होई गई ते 4 होर जखमी होई गे। पुलिस मताबक पृथ्वीनाथ मंदर जा'रदी 15 श्रद्धालुएं कन्नै भरोची दी इक बोलेरो कार अनियंत्रित होइयै पारासराय अलावल देवरिया शिड़क पर रेहरा ग्रां च सरयू नैहर पुल कश नहर च जाई पेई। नहर थमां 11 लोथां बरामद करी लैतियां गेइया। 4 लोकें गी सुरक्षित कडुआ गेआ ऐ। प्रधानमंत्री नरेंद्र मोदी होरें इस हादसे च मरने आहले लोकें प्रति दुख व्यक्त कीता ऐ। इक सोशल मीडिया पोस्ट च प्रधानमंत्री होरें आखेआ जे हर इक मृतक दे नेडमे परौआर जन गी प्रधानमंत्री राश्ट्रीय राहत कोष थमां 2-2 लख ते जखमियें गी 50-50 जहार रपे दित्ते जाडन।

<><><><><><>

Russia-Earthquake

रूस दे कुरील द्वीप पर अज्ज बडुलै 6 अशारिया 8 तीव्रता दे शक्तिशाली भूंचाल दे झटके मसूस कीते गे। इस भूंचाल करी रूस दे कामचटका प्रायद्वीप दे किश हिस्सें लेई सुनामी दी चेतावनी जारी कीती गई ऐ। प्रशासन नै आखेआ जे सुनामी करी समुंद्र च उच्ची लैहर उठी सकदी ऐ। रूस च इक हफ्ते च एह दुआ शक्तिशाली भूंचाल ऐ। इस क्षेत्र च 30 जुलाई गी 8 अशारिया 8 तीव्रता दा भूंचाल आया हा।

<><><><><><>

Chile-Mine

चिली स्थित अल टेनिएट तांबे दी खदान दे आंशिक रूप नै धराशाई होई जाने करी मरने आहलें दी गिनतरी 2 होई गई ऐ। वीरवार गी आए दे भूंचाल करी विश्व दी सब्भनें शा बड्डी भूमिगत तांबे दी खदान च 700 मीटर शा मती गहराई च 5 मजूर फंसी गे हे। 100 बरे परानी खदान च खनन दा कम्म रोकी दित्ता गेआ ऐ। चिल्ली विश्व दा त्रीया सब्भनें शा बड्ठा तांबा उत्पादक देश ऐ। चिली नै 2024 च कोइ, 5 अशारिया 3 मिलियन उत्पादन कीता हा।

<><><><><><>

IMD-Weather

दिल्ली च जंदी रातीं थमां हल्की कणी कनोण जारी ऐ ते एल्लै बी दिल्ली एनसीआर दे इलाके च घने बद्दल घनोए दे ना। मौसम विभाग नै अज्ज किश इलाकें च गर्जी-चमकियै बरने दे असार दस्से दे ना। एहदे अलावा अरूणाचल प्रदेश, असम, मेघालय, सिक्किम ते पच्छिम बंगाल दे पहाड़ी इलाके च भारी बरखा दी पेशगोई कीती गेदी ऐ। तोआई,

बिहार, पूर्वी उत्तर प्रदेश, केरल, माहे, तमिलनाडू, पुदुचेरी, कराईकल ते उत्तराखंड च बी
अज्ज भारी बरखा दा इमकान ऐ।

<><><><><><>

Table-Tennis

ब्राजील दे फोज डू इगुआकू च चला'रदे विश्व टेबल टेनिस स्टार कंटेडर टूर्नामेंट च भारत
दा शानदार प्रदर्शन जारी ऐ। मानुष शाह ते दिया चिताले दी जोड़ी अज्ज मिक्स्ड डबल्स
दा फाइनल खेडोग। मैच भारती समें मताबक राती 9 बजे शुरू होग। फाइनल च
भारतीय जोड़ी दा सामना जपान दे सातोशी आइदा ते होनोका हाशिमोती कन्नै होग।

<><><><><><>